

## Lekcija 2

### Dobri momci, loši momci?

#### Koji položaj imaju političari u demokratiji?

<b>Vaspitno-obrazovni ciljevi</b>	Učenici shvataju ideju da jedna osoba može zastupati cijelu grupu ljudi. Razvijaju razumijevanje koncepta delegiranja moći i odgovornosti.
<b>Nastavni zadaci</b>	Učenici upoređuju svoje ideje o šemi političkog predstavništva u demokratiji. Raspravljaju o svojim pogledima na političare i upoređuju ih sa mišljenjima koji drugi ljudi imaju o političarima. Kako bi to napravili sprovode kratke intervjuje.
<b>Nastavni materijali</b>	Šema političkog predstavništva, olovka, papir.
<b>Metodi</b>	Individualni rad, grupni rad, plenarna rasprava.

### Opis lekcije

Učenicima se predstavlja model političkog predstavništva u demokratiji (radni materijal). Nastavnik polako uvodi koncept delegiranja unutar države i objašnjava učenicima da isto kao što postoje predstavnici razreda, tako postoje i predstavnici država. Njima je delegirana moć.

Nastavnik pruža informacije o šemi i objašnjava sistem predstavništva. Proces izbora predstavnika drugačiji je u raznim sistemima (na primjer, u direktnoj demokratiji ili u indirektnoj demokratiji).

Samostalnim radom, učenici ispunjavaju prazne prostore u radnom materijalu. Potom formiraju parove i raspravljaju o tome šta znaju o političarima i razmjenjuju svoja mišljenja o njima. Pritom bi od pomoći mogla da budu sljedeća pitanja:

- Šta mislite o političarima?
- Koje političare poznajete?
- Šta bi političari trebali raditi?
- Šta političari ne bi smjeli raditi?
- Zašto toliko mnogo ljudi misli da su političari loši?

Učenicima se daje zadatak da sprovode intervjuje i pitaju druge ljude za mišljenje o političarima i njihovim kompetencijama. Zapisuju pitanja koja žele da postave članovima svoje porodice, bliskim prijateljima i njihovoj zajednici. Nastavnik ih upućuje da vode zabilješke o odgovorima koje ljudi iznose. Neka od mogućih pitanja bila bi:

- Koje kompetencije bi trebalo da ima političar?
- Po vašem mišljenju zašto toliko ljudi negativno misli o političarima?
- Koje osobine bi trebalo da ima političar?
- Koje osobine ne bi trebalo da ima političar?

Učenici sprovode intervjuje poslije nastave i donose rezultate na sljedeći čas.